


IBANGA 3 ULWIMI LWEENKOBE

Impelaveki esingasoze siyilibale



ISIXHOUSA

Inqanaba:

2

Incwadi

3



Ukufunda ngokwamaqela ngoncedo lukatitshala

Phambi kokufunda

- Tyhila ibali abaza kulifunda. Thetha ngemifanekiso.
- Cela abafundi baqashisele ukuba lingantoni na ibali ngokujonga kwizihloko nemifanekiso.
- Cacisela abafundi amagama amatsha okanye anzima phambi kokuba baqalise ukufunda.
- Yenza amakhadi amagama ukufundisa isigama esitsha. (Jonga uluhlu lwasigama esitsha kumphakathi woqweqwe lwangasemva.)

Xa kufundwa okokuqala

- Abafundi mabafunde incwadi ngabanye-ngabanye.
- Abafundi mabafunde ngokuthe cwaka okanye bafunde incwadi ngokusebeza.
- Yiya kumfundu ngamnye umcele ukuba afunde umhlathi encwadini ekhwaza.

Ingxoxo

- Buza imibuzo evavanya ukuqonda esekelewe encwadini.
- Gxinisa kwizandi, amagama angaqhelekanga okanye anzima nakwisigama.
- Uya kufumana imisebenzi engemva kule ncwadi iluncedo ekukhokeleni ingxoxo. (Khetha imisebenzi elungele umgangatho wabafundi).

Xa kufundwa okwesibini

- Kwiintsuku ezilandelayo, bayeke abafundi bafunde kwakhona, ngababini okanye emnye.
- Gxinisa ekufundeni kakuhle, igrاما nesigama.
- Bayeke abafundi bagqibezele imisebenzi equkwe ngemva kule ncwadi ngokwamaqela. Khetha imisetenzana efanele umgangatho wabafundi.



Abafundi mabenze umdlalwana
ukuba incwadi iyakuvumela oko.



Abafundi mabenze imisebenzi yokufunda
ngokwamaqela emva kwesifundo. Bayalele
abafundi basebenze ngokwamaqela benze
imisebenzi efanelekileyo yokufunda
ngokwamaqela efumaneka ngemva encwadini.
Mabangabhalu kule ncwadi. Imisebenzi ebhalwayo
mayenziwe kwiincwadi zabo zemisebenzi.

Impelaveki esingasoze siyilibale



Yayiyimpelaveki yam yokutyelela
uMakhulu noTatomkhulu efama.

Mna nomhlobo wam omkhulu uZaza
sasincokola ngempelaveki yethu qho
sakufumana ithuba loko.

Utitshalakazi wethu uNkszn. Botha
wasibhaqa sigqithiselana izibhilivana
ezazithetha ngaloo mpelaveki, kodwa
zange isikhathaze loo nto kuba
sasixhelelw' eXhukwane.



Sasikuthanda efama. Kwakukho
amadada, amarhanisi, iiinkuku, iidonki,
izinja, iiinkawu, ndibala ntoni na?
Kwakukho namatakane eebhokhwe
amathathu.

Ezi bhokhwe zihlala kwi hoko esecaleni
kweyeedonki. Zinoboya obudlakadlaka,
iindlebe namehlo amakhulu, iimpondo
ezisembindini webunzi.

Rhoqo ngo Mgqibelo uMakhulu
no Tatomkhulu banxiba iibhutsi zabo
zerabha neeovarolo baye kucoca ihoko
yeebhokhwe.

Khawuyijonge ihoko yazo! Ayimdaka
yeha!



Sathi xa singena efama, ndanamanwele.
Ndaqonda ukuba kukho into
engalunganga. uMakhulu noTatomkhulu
babengasikhawulelanga esangweni.

"Hayi bo mama, jonga nasi isimanga!
Naba uMakhulu noTatomkhulu belele
ehokweni emdaka."

"UmntakaNantsi!" wakhuza umama.
Ziphi iibhokhwe? Bayephi uNgwenya
noLala noBhili? Ngokuqinisekileyo
bazimele kwakhona!

Benjamin, wena noZaza hambani niye
kukhangela iibhokhwe mna ndiza
kunceda uMakhulu noTatomkhulu.


"Ndiyathemba abanandawo
yaphukileyo!"



UNgwenya wayeyibhokhwe elulame
kakhulu eyakhuliswa kunye nezinja,
kwaye wayesisidalwa esingaqhelekanga.
Wayengazazi nokuba uyinja okanye
uyibhokhwe okanye ungumntu. UMakhulu
wamncancisa ibhotile yosana esakhula.
Eselitakanana wayedla ngokuba amalaphu
aze alale phezu kweesofa.

UNgwenya lo wayehlakaniphile kuba wayedla
ngokulivula isango lehoko azimele. Ezinye
iibhokwe zazimlandela zitsibe emva kwakhe.

ULala, eyona bhokhwe incinci, naye
wayehlangulwe. UBhili, eyona bhokhwe
indala, wayesoloko enomsindo ethanda
ukuhlaba abantu ngasemva. Ndazi kwangoko
ukuba kwenzeke loo nto kanye kuMakhulu
noTatomkhulu!



Sakhawuleza saya edlelweni. Sazifumana zontathu zisitya ingca nameva acolekileyo kwelo thafa.

Ndaba nendawo enqwenela ukuba ndiziyeyeke apho, kodwa kwakungekho cingo, kwaye ezi bhokhwe zazizithanda iintyatyambo zesiqwane zikaMnu. noNksk. Nathe ezintle ngolona hlobo.

Sazibiza ngokuzolileyo. "Ngwenya, Bhili nawe Lala, yizani." UBhili waphakamisa iindlebe zakhe waqalisa ukuqhwaya emhlabeni ngeempuphu zakhe.



Ndaya kuNgwenya kuqala. Ndasebeza endlebeni yakhe waze wahamba ecaleni kwam ethe cwaka. ULala walandela uZaza saze sazikhokelela ehokweni yazo.

UMakhulu noTatomkhulu babengasekho apho ehokweni. Umama wabakhupha waze waqinisekisa ukuba abonzakalanga. Babehleli ezitulweni zabo kwisituphu sangasemva.

Sayitshixa ihoko saza saya kulanda uBhili. Samfaka ibhanti yenja enentambo ende entanyeni saze samtsala ngayo ukubuyela ehokweni eqhashambula enjalo.



Safika silindelwe yimiqathane ebhakwe ekhaya kunye nekofu. "Enkosi kakhulu Makhulu," sakhwaza sobabini. Sasiyithanda kakhulu imiqathane ebhakwe nguMakhulu.

UMakhulu wayenezinja ezintlanu: UBhobhi, uJoja, uToki, uThayiga noStompi. Zonke zazingenamakhaya zizulazula esithubenziyimiduka nje, zaze zathathwa ngoomakhulu bazigcina yazezabo.

UBhobhi wayeyintombi enemilenze emide enesikhumba esikhazimlayo esimdaka ngebala enamehlo amakhulu anobufekefeke.



Ezi zinja zazidlala indima enkulu efama.
UThayiga wayezakhele ubuhlobo
noRhanisi. Sathi sakumbiza uThayiga
ukuze azofumana izimuncumuncu zakhe,
akayithanda mpela loo nto uRhanisi
ngakumbi singamphathelanga nto yena.
Ndakhawuleza ndabuyela ekhitshini
ndamphathela isonka.

UJoja yena wayeyinja kaMakhulu. Kudala
wabakho kangangokuba nam ndaqabuka
ekho. Wayemthanda kakhulu uMakhulu
kwaye ebekuthanda ukuziqhusheka kuye
nanini na akufumana ithuba.

UToki noStompi babezizinja ezincinci
ezisoloko ziqhogene. Zaziluncedo kakhulu
ekukhuseleni iiinkuku zingafunyanwa
ziingcuka xa zingene efama.



UMakhulu noTatomkhulu babenedama elikhulu kwifama yabo. Sasikuthanda ukuqubha kulo qho xa sibandwendwele noZaza. Ngentsasa elandelayo mna noZaza nezinja zontlanu sabaleka ukuya edamini siyoqubha. UBhobhi wayekuthanda kakhulu ukuqubha ngaphezu kwazo zonke ezinye. Ngenye imini ndandifunyenwe yinkantsi ndisemanzini, ndancedwa nguye wanditsala ngengalo wandikhuphela ngaphandle edamini. Siziva sikhuselekile noZaza xa sinoBhobhi ecaleni kwethu.



Emva kwethuba sizonwabele edamini, sagoduka kuba yayilixesha lesidlo sasemini. Endleleni seva isikhalo setakane "mhee-ee". Yayilitakane legusha elisandul' ukuzalwa libambeke etyholweni elinameva. "Zaza, khawundincedise sikhulule eli takane kula meva," ndatsho. Emva kwemigudu sakwazi ukulikhulula itakane. Langceleza ukuya kunina owayesijonge enexhala.

Sabaliselə wonke umntu ngento esiyenzileyo sakufika ekhaya.

"Nenze kakuhle. Ndiyabulela. Inene niza kuba nento eninzi yokubalisela abahlobo benu esikolweni ngomso," watsho utata ngebhongo.

Olunjani lona utyelelo! Siyakuthanda efama. Iinkumbulo ezimnandi ezinjalo zihlala nathi ngonaphakade.



Amatakan' Eegusha

Ayaqakaqakath' amatakane eegusha.
Ayadlobadlob' ajikelez' isibaya.
Kukho ncutshe yon' etaka ngokweliza.
Ityhulutyhuluba naphantsi kwamahlahla.
Yintshatsheli kulo mhlambi wamaxhwane.


Bona nanko loo mlanjana uzek' indlela.
Uthe qhiwu loo misilan' isengozini.
Iqhayiya layo liyesuswa kwangomso.
Isitshetshe sesilolwe sayintshengula.
Amakhwenkw' awatyumbil' amaqashiso.

Dlobani maxhwan' amahle bayez' omama,
Abonwabanga ngani zinchinanana.

Nabo benxakama bexel' imaz' enkomo.
Hayi laa malus' uyabaphithizelisa,
Ubaphethuphethula ngomnqay' ulambile.


Maxhwan' amahle, hlalani nichwayitile.
Mayingaze inihlele inqin' ezweni.
Loo mizinjana yenu impuluswa,
Ezo nyawana zenu zitwakutwaku,
Mazihlale zihleli zinjalo kaloku.

Buyani bonozala iyajwed' intsapho.
Nabo bevela onina bengumngcelele.
Ayahlangabeza amatakan' eegusha,
Ahamb' ekhala ngovuyokazi,
'Mhe! mhe! mhe! mhe! mhe-e!'



Ubusazi na

- ✓ Imazi yebhokhwe netakane layo ziyakwazi ukuvana xa zibizana emva kokuba umama efumene itakane.
- ✓ Iibhokhwe zinokulungelelanisa okungummangaliso. Zinokuxhathisa okumangalisayo kangangokuba ziyakwazi ukuphila ezintabeni ezimqengqezezi.
- ✓ Iibhokhwe ziyakwazi ukukhwela emithini kwaye ezinye ziyakwazi ukutsiba ngaphaya kwento ephakame kangangemitha enesiqingatha.
- ✓ Inkuku sesona sidalwana sisondeleyo seTyrannosaurus Rex esiphilayo.
- ✓ Inkuku ziyakwazi ukuqaphela nokukhumbula abantu abohlukeneyo.
- ✓ Iqela lamarhanisi kuthiya ngumhlambi.
- ✓ Iqela lamarhanisi abhabha enze imilo engu-V kuthiya sisiskeyjini/sisikhinkci.
- ✓ Umntwana werhanisi kuthiya lintshontsho lerhanisi.
- ✓ Izinja zaziwa njengabona ‘bahlobo babantu’.
- ✓ Izinja zineendlebe ezibukhali kwaye ziyakwazi ukuva izandi ezikude ukodlula thina bantu.
- ✓ Izinja sizisebenzisa njengezinja zokukhokela, ezamapolisa nanjengezilo-qabane. Zihlakaniphile kakulu.



Imisebenzi yokufunda yamaqela



1

Funda le mibuzo ilandelayo uze ubhale iimpendulo.

- a. UZaza no Benjamin bebegqithiselana izibhilivana egumbini lokufundela. Ucinga ukuba kwenzeka ntoni kula makhwenkwe?
- b. Athini amagama eebhokhwe? Yeyiphi ibhokhwe oyithandayo. Kutheni usitsho nje?
- c. Chaza ukuba kwenzeka ntoni ku Makhulu no Tatomkhulu. Bhala izivakalisi ezi-5.
- d. Benza njani u Zaza no Benjamin ukuze bakwazi ukubuyisela u Bhili ehokweni yakhe?
- e. Balisindisa njani itakane u Zaza no Benjamin?
- f. Ucinga ukuba u Zaza no Benjamin bahlala edolophini okanye efama? Kutheni ucinga njalo nje?
- g. Ungathanda ukuhlala efama wena? Ngoba kutheni?



2

Yiba ngathi ungu Zaza. Bhalela oo Makhulu baka Benjamin iletta ubabulele ngempelaveki emnandi oyichithe efama.

IBANGA 3 ULWIMI LWEENKOBE



Incwadi 3

Isihloko:	Impelaveki esingasoze siyilibale
Ulwimi:	IsiXhosa
Inqanaba:	Incwadi yokufunda yoLwimi Lweenkobe yeBanga lesi-3 Inqanaba 2 Incwadi 3
Uhlobo lwencwadi:	Ibali
Amagama ajongwayo:	ngaphakathi, ngasemva, qho, rhoqo, ncokola, ndaqabuka, eqhashambula
Isigama:	isibhilivana, amanwele, khawulela, lulama, isiqwane, iimpuphu, imiqathane, ukuziqhushuka, inkantsi, ukuqhogana, ukuqhwaya
Izandi:	ee, nts, ntl, ndw, ngc, qhw, thw, tyh.
Umxholo, amagama nezakhono:	<ul style="list-style-type: none">▪ Phendula imibuzo yovavanyo lokuqonda.▪ Bhala ileta yombulelo.

Inkqubo ye-CAPS igunyazisa ukuba ootitshala babe nexesa abalibekela bucala ngosuku ngalunye, kulungiselelwa ukufunda ngamaqela encediswa ngutitshala.

ukufunda ngamaqela encediswa ngutitshala kujolise ekubeni abafundi abakwinqanaba lokufunda elifanayo bafunde isicatshulwa esifanayo ngoncedo lukatitshala.

Utitshala kufuneka enze isicwangciso sokufunda esiquka iindlela zobuchule bokufunda nokuqonda amagama, zokuxhobisa abafundi xa befunda.


Ezi ndlela zobuchule ziquka "incoko ngebali" ephakathi kukatitshala nabafundi, nephakathi kwabafundi emaqeleni abo. Ezi ncwadi ziqulethe iqela lemisebenzi malunga nezi "ncoko ngebali". ukuqonda neminye enokunceda ootitshala ekukhokeleni ukufunda ngokwamaqela emagumbini abo.

ISBN 978-1-4315-2618-5



9 781431 526185

ISBN 978-1-4315-2518-5



**THIS BOOK MAY NOT
BE SOLD.**



basic education

Department:
Basic Education
REPUBLIC OF SOUTH AFRICA

Published by the Department of Basic Education
222 Struben Street, Pretoria
South Africa

© Department of Basic Education
First edition 2016

The Department of Basic Education has made every effort to trace copyright holders but if any have been inadvertently overlooked, the Department will be pleased to make the necessary arrangements at the first opportunity.

**Ezinye iincwadi ezikwithala
leencwadi zeBanga lesi-3
zoLwimi Lweenkobe**



**UMvundlana ughatha
uMpungutye**

Utyelelo elwandle

Uyolo lwasekhithshini

Idayari kaNozikhalazo



Izilwanyana ziqhweshile

UThandi unemini embi

Impelaveki esingasoze siyilibale



Irhamncwa ekhabbhathini

**Ityala lokulahlekwa
kwamaqebengwana**

Yinyaniso emsulwa